



www.qbz.gov.al

FLETORJA ZYRTARE E REPUBLIKËS SË SHQIPËRISË

Botim i Qendrës së Botimeve Zyrtare

Viti: 2015 – Numri: 152

Tiranë – E mërkurë, 26 gusht 2015

PËRMBAJTJA

	Faqe
Dekret i Presidentit nr. 9207, datë 19.8.2015	Për dhënie të shtetësisë shqiptare..... 11079
Vendim i Entit Rregullator të Energjisë nr. 100, datë 5.8.2015	Për miratimin e rregullave për certifikimin e operatorit të sistemit të transmetimit për gazin natyror..... 11079
Vendim i Entit Rregullator të Energjisë nr. 101, datë 5.8.2015	Për fillimin e procedurave për shqyrtimin e aplikimit të shoqërisë TAP AG për certifikim si operator i pavarur i transmetimit të gazit natyror..... 11089
Vendim i Entit Rregullator të Energjisë nr. 102, datë 18.8.2015	Për fillimin e procedurave për shqyrtimin dhe miratimin e rregullave të ankandit të zyrës së koordinuar të ankandëve për Evropën Juglindore (SEE CAO) versioni 1.2..... 11090
Vendim i Entit Rregullator të Energjisë nr. 103, datë 18.8.2015	Për licencimin e shoqërisë “Lengarica & Energy” sh.p.k. në aktivitetin e prodhimit të energjisë elektrike nga HEC “Lengarica” (me fuqi të instaluar 8.94 MW)..... 11091
Vendim i Entit Rregullator të Energjisë nr. 104, datë 18.8.2015	Për licencimin e shoqërisë “Lengarica & Energy” sh.p.k., në aktivitetin e tregtimit të energjisë elektrike..... 11091
Vendim i Entit Rregullator të Energjisë nr. 105, datë 18.8.2015	Për licencimin e shoqërisë “Lengarica & Energy” sh.p.k., në aktivitetin e furnizimit të energjisë elektrike..... 11092
Vendim i Entit Rregullator të Energjisë nr. 106, datë 18.8.2015	Për fillimin e procedurave për rinovimin e licencës së shoqërisë “Energy Supply” sh.p.k. në aktivitetin e tregtimit të energjisë elektrike, miratuar me vendimin e Bordit të Komisionerëve të ERE-s nr. 6, datë 2.2.2011..... 11092
Vendim i Entit Rregullator të Energjisë nr. 107, datë 18.8.2015	Për fillimin e procedurave për licencimin e shoqërisë “Energy Supply” sh.p.k. në aktivitetin e furnizimit të energjisë elektrike..... 11093



DEKRET
Nr. 9207, datë 19.8.2015

PËR DHËNIE TË SHTETËSISË
SHQIPTARE

Në mbështetje të nenit 92, pika “c”, dhe nenit 93 të Kushtetutës, si dhe nenit 9, pika 7, e nenit 20 të ligjit nr. 8389, datë 05.08.1998, “Për shtetësinë shqiptare”, të ndryshuar, bazuar edhe në propozimin e Ministrit të Financave, Ministrit të Kulturës dhe Ministrit të Zhvillimit Ekonomik, Tregtisë dhe Sipërmarrjes,

DEKRETOJ:

Neni 1

U jepet shtetësia shqiptare me kërkesë të tyre personave të mëposhtëm:

1. Denada Vangjel Prifti
2. Alban Skender Muja
3. Sylejman Hajrullah Kllokoqi
4. Okay Osman Okayay

Neni 2

Ky dekret hyn në fuqi menjëherë.

PRESIDENTI I REPUBLIKËS
SË SHQIPËRISË
Bujar Nishani

VENDIM
Nr. 100, datë 5.8.2015

PËR MIRATIMIN E RREGULLAVE
PËR CERTIFIKIMIN E OPERATORIT
TË SISTEMIT TË TRANSMETIMIT PËR
GAZIN NATYROR

Bazuar në nenin 9 të ligjit nr. 9946, datë 30.06.2008 “Për sektorin e gazit natyror”, të ndryshuar, nenet 7 dhe 149 të ligjit nr. 8485, datë 12.5.1999, “Kodi i Procedurave Administrative të Republikës së Shqipërisë”, të ndryshuar, Traktatit të Komunitetit të Energjisë të ratifikuar me ligjin nr. 9501, datë 3.4.2006, “Rregullat për organizimin, funksionimin dhe procedurat e ERE-s”, vendimit të Këshillit Ministerial nr. D/2011/02/MC-EnC, si dhe në përputhje me direktivën 2009/73-EC dhe rregulloren EC nr.715/2009, Bordi i ERE-s, në mbledhjen e tij të datës 5.8.2015, mbasi shqyrtoi draftin e përgatitur nga grupi i punës të rregullores

për certifikimin e operatorit të sistemit të transmetimit të gazit natyror, dhe relacionin përkatës për shqyrtimin dhe miratimin e rregullores për certifikimin e operatorit të sistemit të transmetimit të gazit natyror,

VENDOSI:

Miratimin e “Rregullave për certifikimin e operatorit të sistemit të transmetimit të gazit natyror” (Rregullat bashkëlidhur këtij vendimi).

Ky vendim hyn në fuqi menjëherë.

Ky vendim botohet në Fletoren Zyrtare.

KRYETARI
Petrit Ahmeti

RREGULLAT
PËR CERTIFIKIMIN E OPERATORIT TË
SISTEMIT TË TRANSMETIMIT PËR
GAZIN NATYROR

KAPITULLI I
DISPOZITA TË PËRGJITHSHME

Neni 1

Autoriteti

Këto rregulla hartohen në bazë të nenit 9 të ligjit nr. 9946, datë 30.6.2008 “Për sektorin e gazit natyror”, neneve 7 dhe 149 të ligjit nr. 8485, datë 12.05.1999, “Kodi i Procedurave Administrative të Republikës së Shqipërisë”, të ndryshuar, Traktatit të Komunitetit të Energjisë të ratifikuar me ligjin nr. 9051, datë 03.04.2006, Rregullat për organizimin, Funksionimin dhe procedurave të EREs, vendimit të Këshillit Ministerial nr. D/2011/02/MC-EnC, si dhe në përputhje me direktivën 2009/73-EC dhe rregulloren EC nr. 715/2009.

Neni 2

Qëllimi

Qëllimi i kësaj Rregulloreje është sigurimi i një procesi certifikimi transparent, të plotë, të besueshëm dhe koherent me çdo ndryshim eventual i cili garanton përputhshmërinë me kushtet që sigurojnë pavarësinë dhe ndarjen e operatorit të sistemit të transmetimit të gazit natyror, që garanton ndarjen e plotë nga aktivitetet e tjera të sektorit të gazit natyror, si dhe energjisë elektrike, në funksion të zhvillimit të sektorit



gazit natyror në përputhje me rekomandimet e paketës së tretë legislative të BE, si dhe garantimin e rolit mbikëqyrës të ERE mbi aktivitetin e operatorit të sistemit të transmetimit të gazit natyror.

Neni 3

Objekti dhe fusha e zbatimit për rregullatorin

1. Rregullorja për certifikimin e operatorit të sistemit të transmetimit të gazit natyror (më poshtë – “Rregullorja”) përcakton kërkesat procedurale për certifikimin e operatorit të sistemit të transmetimit të gazit natyror në Shqipëri, duke përfshirë këtu kushtet dhe afatet për paraqitjen e dokumenteve, të dhënave dhe informacioneve, si kërkohen nga procedurat e certifikimit tek Enti Rregullator i Energjisë (më poshtë – “ERE”).

2. Rregullorja përcakton listën e dokumenteve, të dhënave dhe informacioneve që duhet të paraqiten nga kompanitë e gazit natyror të cilat aplikojnë për t’u caktuar si operatorë të sistemit të transmetimit të gazit natyror në Shqipëri.

3. Licencimi për aktivitetet e operatorit të sistemit të transmetimit të gazit natyror do të rregullohet nga rregullorja për procedurat dhe afatet për dhënien, modifikimin, transferimin, ose heqjen e licencave, si dhe informacionin që duhet paraqitur në kërkesën për aplikim për çdo licencë të gazit natyror të miratuara nga ERE.

Neni 4

Zbatimi dhe interpretimi i Rregullores

1. Rregullorja do të aplikohet për operatorin e autorizuar të sistemit të transmetimit të gazit natyror apo çdo shoqëri e cila aplikon për t’u caktuar si operator i sistemit të transmetimit të gazit natyror.

2. Aplikimi i duhur i rregullores do të garantohet, monitorohet dhe mbikëqyret nga ERE.

Rregullorja duhet të zbatohet dhe interpretohet në përputhje me dispozitat e direktivës 2009/73-EC si dhe rregulloren EC nr. 715/2009, aktet ligjore të cilat rregullojnë procedurat e brendshme dhe organizimin e punës të ERE, përkatësisht “Rregullat e praktikës dhe procedurave të ERE-s”, si dhe duke marrë në konsideratë “Udhëzimet interpretuese mbi direktivën 2009/72/EC në lidhje me rregullat e përbashkëta për tregun e brendshëm

të energjisë elektrike dhe direktivën 2009/73/EC në lidhje me rregullat e përbashkëta për tregun e brendshëm të gazit natyror, regjimi i ndarjes së aktiviteteve (Material diskutimi i stafit të Komisionit, Bruksel, 22 janar 2010”, “Materialin e diskutimit e stafit të Komisionit, për certifikimin e operatorëve të sistemit të transmetimit të rjetit të energjisë elektrike dhe gazit natyror në Bashkimin Evropian, Bruksel (21.9.2011, SEC (2011) 1095 final)” dhe duke u këshilluar me Sekretariatën e Komunitetit të Energjisë (në vijim – Sekretariati).

Neni 5

Përkufizimet

Të gjitha termat e përdorur në Rregullore duhet të kuptohen dhe interpretohen siç janë përcaktuar në këtë Rregullore.

1. “Certifikim” është procedura, e cila përcakton përputhshmërinë me kushtet që sigurojnë pavarësinë dhe ndarjen e operatorit të sistemit të transmetimit, si një parakusht për licencimin në përputhje me parashikimet e legjislacionit në fuqi.

2. “Enti Rregullator i Energjisë” ose “ERE” është institucioni rregullator i sektorit të energjisë elektrike dhe gazit natyror, i cili funksionon në përputhje me ligjin për gazin natyror dhe ligjin për sektorin e energjisë elektrike.

3. “ENTSO-G” është Rjeti Evropian i Sistemit të Operatorëve të Transmetimit të Gazit.

4. “Licencë” është e drejta që i jepet një personi për të ushtruar njërin nga veprimtaritë e sektorit të gazit natyror në përputhje me parashikimet e legjislacionit në fuqi.

5. “Linjë interkonjeksioni” është një linjë transmetimi, e cila lidh sistemet e transmetimit të gazit ndërmjet dy shteteve.

6. “Operim” është vënia në veprim dhe shfrytëzim në kuptimin tregtar, të infrastrukturës së sistemit të gazit natyror.

7. “Operimi i tregut” është veprimtaria që kryen operatori i tregut lidhur me menaxhimin e tregut të gazit natyror dhe përgatitjen e raporteve financiare për pjesëmarrësit e tregut, pa përfshirë blerjen apo shitjen e gazit natyror, në përputhje me parashikimet e rregullave të tregut.

8. “Operator” është personi që përdor apo kontrollon funksionet teknike të instalimeve në përputhje me legjislacionin në fuqi.



9. “Operator i rrjetit” është operatori i sistemit të transmetimit dhe/ose operatori i sistemit të shpërndarjes.

10. “Operator i sistemit të transmetimit (OST)” është personi juridik, që kryen veprimtarinë e transmetimit, përgjegjësinë për operimin, sigurimin e mirëmbajtjes dhe zhvillimin e sistemit të transmetimit në një zonë të caktuar, lidhjen e tij me sistemet e tjera.

11. “Palë e Komunitetit të Energjisë” nënkupton çdo palë kontraktore e Traktatit të Komunitetit të Energjisë.

12. “Prodhues” është personi, i cili ushtron veprimtarinë për prodhimin e gazit natyror.

13. “Rregullat e tregut” janë rregulla që përcaktojnë mënyrën e operimit dhe menaxhimit të tregut, regjistrimin e pjesëmarrësve, përgjegjësinë e balancimit prej pjesëmarrësve të tregut të gazit natyror, rregullat për balancimin e sistemit të gazit natyror, rregullat për llogaritjen e disbalancës për palët përgjegjëse të balancimit, rregullat për përgjegjësitë financiare të palëve përgjegjëse të balancimit në rast të disbalancimit, si dhe çështje të tjera lidhur me funksionimin e tregut.

14. “Sekretariati i Komunitetit të Energjisë” është institucion i Komunitetit të Energjisë që funksionon në bazë të Traktatit të Komunitetit të Energjisë.

15. “Shoqëri furnizimi” është personi që kryen veprimtarinë e furnizimit me gaz natyror.

16. “Shoqëri e gazit natyror” është personi që kryen të paktën njërin prej veprimtarive, si: prodhimin, transmetimin, shpërndarjen, furnizimin, blerjen ose depozitimin e gazit natyror, përfshirë GNL dhe që është përgjegjës për detyrat tregtare e teknike dhe/ose mirëmbajtjen, që lidhen me këto funksione, pa përfshirë klientët fundorë.

17. “Shoqëri e integruar e gazit natyror” është një shoqëri, vertikalisht ose horizontalisht e integruar.

18. “Shoqëri horizontalisht e integruar” është një shoqëri gazi natyror, që kryen të paktën njërin prej veprimtarive, si të prodhimit, të transmetimit, të shpërndarjes, depozitimit ose furnizimit të gazit natyror dhe të një veprimtarie tjetër, jashtë sektorit të gazit natyror.

19. “Shoqëri të lidhura” janë shoqëritë e lidhura dhe/ose të bashkuara sipas parashikimeve të legjislacionit për mbrojtjen e konkurrencës.

20. “Shoqëri vertikalisht e integruar” është një

shoqëri ose grup shoqërisht të licencuara në sektorin e gazit natyror, ku i njëjti person ose persona, ushtrojnë kontroll mbi këto shoqëri në mënyrë të drejtpërdrejtë ose të tërthortë dhe ku shoqëria ose grupi i shoqërive kryejnë të paktën një prej veprimtarive të transmetimit, shpërndarjes, operimit të impiantit të GNL ose depozitimit dhe të paktën njërin prej veprimtarive të prodhimit apo furnizimit të gazit natyror.

21. “Shpërndarje” është transporti i gazit natyror nëpërmjet rrjetit të shpërndarjes, për lëvizimin e tij tek klientët, pa përfshirë furnizimin.

22. “Transmetim” është transporti i gazit natyror, nëpërmjet një rrjeti tubacionesh të presionit të lartë, i ndryshëm nga rrjeti i tubacionit në sektorin e kërkim-prodhimit, si edhe i ndryshëm nga një pjesë e tubacioneve të presionit të lartë të përdorura paraprakisht për shpërndarjen e gazit natyror ku synohet lëvizimi i tij te klientët, pa përfshirë furnizimin.

23. “Tregtar i gazit” është një shoqëri që kryen veprimtari të tregtisë së gazit natyror si një veprimtari tregu, i pajisur me licencë për të ushtruar këtë veprimtari.

25. “Tregtim” është blerja ose shitja me shumicë e gazit natyror.

26. “Vende të treta” është çdo vend i cili nuk është palë e Komunitetit të Energjisë ose anëtare e Hapësirës Ekonomike Evropiane.

27. “Veprimtari” është veprimtaria prodhuese ose përdorimi i instalimeve dhe impianteve të tyre, si edhe shërbimet e lidhura me to.

KAPITULLI II DETYRIMET PËR CERTIFIKIMIN E OPERATORIT TË SISTEMIT TË TRANSMETIMIT TË GAZIT NATYROR

Neni 6

Detyrimet për certifikimin

1. Para se një shoqëri të miratohet dhe caktohet si operator i sistemit të transmetimit të gazit natyror duke u pajisur me licencën e duhur sipas kushteve dhe afateve të përcaktuara në ligjin për gazin natyror dhe “Rregullat dhe kërkesat për dhënie, modifikimin, transferimin, rinovimin dhe heqjen e licencave në sektorin e gazit natyror” të miratuara nga ERE, duhet të jetë e certifikuar nga ERE.



2. “Rregullat dhe kërkesat për dhënie, modifikimin, transferimin, rinovimin dhe heqjen e licencave në sektorin e gazit natyror” miratohen në përputhje me procedurën e parashikuar në ligjin për gazin natyror dhe në rregulloren për organizimin, funksionimin dhe procedurave të ERE-s.

3. Detyrimet e përcaktuara në paragrafin 1 të këtij neni duhet të zbatohen për:

a) operatorin e sistemit të transmetimit të gazit natyror, i cili është i autorizuar për të kryer këto aktivitete para hyrjes në fuqi të kësaj Rregulloreje dhe në vijim do të zbatojë kërkesat e veçanta të kësaj Rregulloreje; ose

b) shoqëria, e cila plotëson kërkesat kualifikuese dhe ato të veçanta për operatorin e sistemit të transmetimit të gazit natyror dhe si pasojë aplikon për t’u kualifikuar si OST; ose

c) shoqëria përgjegjëse për infrastrukturën e re të transmetimit të gazit natyror e cila është përjashtuar nga ndarja e pronësisë me një vendim specifik të përjashtimit (më poshtë “OST e përjashtuar”).

4. Ndarja e operatorit të sistemit të transmetimit të gazit natyror duhet të zbatohet sipas kushteve dhe termave të përcaktuara në këtë Rregullore, dhe kur është e përshtatshme, ligjet dhe rregulloret që janë në zbatim.

5. Në rastet kur një infrastrukturë e re për transmetimin e gazit natyror është “OST e përjashtuar” me vendim të ERE-s, TSO që përgjigjet për operimin e kësaj infrastrukturë të re do të certifikohet në përputhje me kërkesat e vendimit respektiv të përjashtimit nga ERE.

Neni 7

Aplikimi për certifikim

1. Shoqëria e referuar në paragrafin 3 të nenit 6 të Rregullores (në vijim – “shoqëria aplikuese”), në vijim të zbatimit të të gjitha kërkesave për ndarjen e aktivitetit të operatorit të sistemit të transmetimit të gazit natyror, duhet të njoftojë ERE-n me shkrim dhe duhet të paraqesë:

a) kërkesën me shkrim për certifikimin e operatorit të sistemit të transmetimit të gazit natyror;

b) dokumentet, të dhënat dhe informacionet e përmendura në kapitullin III të Rregullores; dhe

c) pyetësonin e plotësuar për certifikimin e operatorit të sistemit të transmetimit të gazit natyror, sipas modelit të dhënë në shtojcën e kësaj Rregulloreje, përveç rasteve kur kompania që ka paraqitur kërkesën është OST e përjashtuar, vendimi i përjashtimit të të cilit parashikon kushtet dhe kërkesat për ndarjen e aktivitetit. Kërkesa për certifikim si operator i sistemit të transmetimit duhet të paraqitet dhe po ashtu procedurat përkatëse të certifikimit duhet të kryhen në mënyrë të pavarur nga licencimi i operatorit të sistemit të transmetimit.

2. Certifikimi i operatorit të sistemit të transmetimit të gazit natyror kryhet vetëm një herë ose në të kundërt rishikohet nëse janë kryer ndryshime thelbësore në lidhje me kontrollin e operatorit të sistemit të transmetimit të gazit natyror ose zotëruesin e operatorit të sistemit të transmetimit të gazit natyror të certifikuar më parë apo nëse kanë ndodhur apo parashikohet të ndodhin ndryshime të cilat cenojnë përmbushjen e kriterëve të përcaktuara në këto rregulla.

KAPITULLI III

PARAQITJA E DOKUMENTAVE, TË DHËNAVE DHE INFORMACIONIT

Neni 8

Lista e dokumenteve, të dhënave dhe informacionit

1. Shoqëria aplikuese, së bashku me kërkesën me shkrim për t’u certifikuar si operator i sistemit të transmetimit të gazit natyror, duhet të paraqesë tek ERE dokumentet, të dhënat dhe informacionin e mëposhtëm për të mbështetur kërkesën për certifikim. Ky dokumentacion mund të përfshijë:

a) kopje të noterizuara të dokumenteve të themelimit dhe të regjistrimit;

b) listën e licencave, lejeve dhe/ose autorizimeve të tjera të mara nga kompania që aplikon për veprimtarinë në sektorin e energjisë në Shqipëri dhe/ose vende të tjera, dhe kopjet e noterizuara të këtyre licencave, lejeve dhe/ose autorizimeve të tjera;

c) listën e aksionarëve, duke treguar qartë aksionet dhe votat që ka secili nga aksionarët;

d) listën e aksionarëve nga vendet e treta, si mund të jetë rasti, që kanë të paktën 5% të aksioneve në total dhe/ose votave në mbledhjet



e përgjithshme të kompanisë që po aplikon, duke treguar qartë aksionet dhe votat që ka secili prej aksionarëve;

e) listën e aksionarëve që nuk kanë të drejtë votimi, kur është e përshtatshme;

f) listën e kompanive të energjisë, të cilat janë në kontroll direkt ose jo nga kompania që ka paraqitur kërkesën për certifikim, duke treguar qartë mënyrën e kontrollit dhe të drejtat e veçanta që ka kjo kompani;

g) listën e kompanive të energjisë, nëse kjo nuk mund të paraqitet listën e aksionarëve, të cilët kanë kontroll direkt ose jo tek kompania që po aplikon për certifikim, duke treguar qartë mënyrën e kontrollit dhe të drejtat e veçanta të këtyre kompanive të energjisë;

h) listën e kompanive të tjera të ngjashme (p.sh. grup kompanish që kanë lidhje), të cilat tregojnë qartë lidhjet që kanë me kompaninë që po aplikon dhe nivelin e bashkëpunimit të ndërsjellë;

i) Listën e licencave, lejeve dhe/ose autorizimeve të tjera të marra nga kompanitë e energjisë, siç u jemi referuar në pikat “P”, “g” dhe “h” të këtij paragrafi, për aktivitetet në sektorin e energjisë në Shqipëri dhe/ose vende të tjera, si dhe kopjet e noterizuara të këtyre licencave, lejeve dhe/pse autorizimeve;

j) kopje të marrëveshjes/kontratës së aksionarëve ose aprovimin me shkrim nga drejtori i përgjithshëm i kompanisë që po aplikon për certifikim që kjo marrëveshje/kontratë nuk ka përfunduar akoma;

k) kopje të akteve të brendshme të cilat rregullojnë organizimin e punës të organeve kolegjiale të korporatave (bordit mbikëqyrës dhe/ose bordit drejtues) të kompanisë që aplikon, nëse këto akte janë miratuar;

l) lista e anëtarëve të organeve kolegjiale të korporatës (bordit mbikëqyrës dhe/ose bordit drejtues) të kompanisë aplikuese dhe kompanive të energjisë si ju jemi referuar në pikat “P”, “g” dhe “h” të këtij paragrafi;

m) vendimin e asamblesë së përgjithshme të kompanisë që po aplikon (duke përfshirë këtu të dhënat e votimit), sipas të cilit ishin emëruar anëtarët e organeve kolegjiale të korporatës (bordit mbikëqyrës dhe/ose bordit drejtues);

n) vendimin e asamblesë së përgjithshme të kompanisë që po aplikon ose të organit kolegjial

të korporatës (bordit mbikëqyrës dhe/ose bordit drejtues), sipas të cilit ishte emëruar drejtuesi ekzekutiv (drejtuesi kryesor) i shoqërisë që po aplikon;

o) kopje të akteve dhe procedurave të brendshme që rregullojnë veprimtarinë e organeve të korporatës për shoqërinë që po aplikon, duke përfshirë këtu edhe ato që përcaktojnë të drejtat e tyre të përfaqësimit;

p) informacion mbi drejtuesin ekzekutiv të shoqërisë që po aplikon dhe punonjësit e tjerë, si dhe funksionet e tyre administrative dhe organizuese tek kompania që po aplikon, ose të personave të tjerë të cilëve iu janë caktuar këto kompetenca me anë të një autorizimi (prokure), siç është:

(i) informacioni mbi kompetencat dhe funksionet e caktuara;

(ii) përshkrimi i veprimtarive të tjera profesionale dhe/ose komerciale;

(iii) deklarata e interesave e cila përmend se këta persona nuk marrin pjesë në aktivitetet e kompanive të energjisë që kanë lidhje me prodhimin, shpërndarjen dhe ose/ose furnizimin me gaz natyror/dhe ose energji elektrike;

q) kopje të akteve dhe procedurave të brendshme, të cilat parandalojnë nxjerrjen e informacionit privat ose informacionit të ndjeshëm tregtar të kompanive të energjisë të cilat merren me prodhimin, shpërndarjen dhe/ose furnizimin me gaz natyror dhe/ose energji elektrike; dhe

r) Informacion rreth punonjësve të kompanisë që po aplikon, të cilët vijnë nga kompani të tjera të energjisë që merren me prodhimin, shpërndarjen, dhe/ose furnizimin me gaz natyror dhe/ose energji elektrike (duke i qartësuar këto kompani energjetike) gjatë periudhës prej gjashtë 6 muajsh para paraqitjes së të dhënave të aplikimit për certifikim.

2. Në rast se kompania që po aplikon është filial i kompanive të huaja të regjistruara sipas rregullave për aktivitetet tregtare në Shqipëri, ajo duhet të paraqesë tek ERE dokumentet, të dhënat dhe informacionin e mëposhtëm:

a) Dokumentet, të dhënat dhe informacion për kompaninë e huaj, filiali i të cilës po aplikon për certifikim, ashtu si kërkohet në paragrafin 1 të këtij neni; dhe



b) Dokumente të filialit, si kërkohet në pikat “a”, “o”, “p”, “q” dhe “r” të paragrafit 1 të këtij neni.

Neni 9

Dorëzimi i dokumenteve, të dhënave dhe informacionit

1. Të gjitha dokumentet, të dhënat dhe informacioni i kërkuar sipas nenit 8, të Rregullores duhet të paraqiten tek ERE në gjuhën Shqipe dhe atë Anglezë me shkrim dhe në mënyrë elektronike.

2. Në çdo kohë gjatë procedurës së certifikimit, ERE dhe sipas rastit, sekretariati mund të kërkojnë nga shoqëria që aplikon dhe/ose aktivitetet e tjera energjetike të lidhur, dokumente, të dhëna dhe/ose informacion shtesë për certifikimin e operatorit të sistemit të transmetimit të gazit natyror.

3. Shoqëria që aplikon ose operatori i sistemit të transmetimit të gazit natyror i certifikuar duhet të njoftojë ERE për çdo ndryshim tek dokumentet, të dhënat dhe/ose informacionet e paraqitura menjëherë, por në çdo rast jo më vonë se pesë (5) ditë pasi ka ndodhur ndryshimi, dhe duhet të paraqesë dokumentet, të dhënat dhe informacionin e korrigjuar.

4. Të gjitha dokumentet duhet të jenë në origjinal dhe/ose të noterizuar sipas rastit kur është e nevojshme.

5. Aplikuesi jep sqarimet dhe informacion shpjegues dhe afatet për kërkesat e mësipërme të cilat në momentin e aplikimit janë në proces kompletimi apo nuk janë relevante dhe të aplikueshme për aplikuesin apo kur i njëjti dokument ezauron më shumë se një kërkesë.

6. Në rastet kur procedohet për rishikimin/rivlerësimin të certifikimit ekzistues në fuqi, informacioni që paraqitet vlerësohet rast pas rasti dhe në përputhje me kërkesat e ERE dhe/apo sekretariatit.

KAPITULLI IV

PROCEDURA E CERTIFIKIMIT

Neni 10

Procedurat që aplikohen për certifikim

1. ERE duhet të certifikojë operatorin e sistemit të transmetimit bazuar në procedurat e vendosura në këtë Rregullore.

2. Duhet të zbatohen procedurat e parashikuara në aktet ligjore të cilat rregullojnë procedurat e brendshme dhe organizimin e punës së ERE-s, por pa ndikim tek paragrafi 1 i këtij neni.

Neni 11

Vendimi për certifikimin

1. ERE duhet ta miratojë certifikimin e operatorit të sistemit të transmetimit të gazit natyror brenda një periudhe prej katër (4) muajsh nga data e marrjes së aplikimit dhe paraqitjes siç duhet të të gjitha dokumenteve, të dhënave dhe informacionit, si kërkohet në kapitullin III të kësaj Rregulloreje.

2. Pas përfundimit të periudhës së specifikuar në paragrafin 1 të këtij neni, nëse nuk është miratuar ndonjë vendim formal nga ERE, certifikimi do të konsiderohet i dhënë bazuar në vendimin e nënkuptuar nga ERE. Vendimi i shprehur qartë ose i nënkuptuar hyn në fuqi vetëm pas përfundimit të procedurave të vendosura në këtë Rregullore.

3. Vendimi i shprehur qartë ose i heshtur për certifikimin e operatorit të sistemit të transmetimit të gazit natyror duhet t'i njoftohet në kohë sekretariatit nga ERE, së bashku me informacionin që i përket këtij vendimi.

4. Brenda katër (4) muajsh pas marrjes së njoftimit të referuar në paragrafin 3 të këtij neni, Sekretariati duhet të dërgojë opinionin e tij tek ERE për pajtueshmërinë me kërkesat e veçanta të caktimit dhe certifikimit të operatorit të sistemit të transmetimit. Në mungesë të një opinion nga Sekretariati brenda një afati të përcaktuar në këtë dokument, pranohet që Sekretariati nuk ka kundërshtime për vendimin e marrë nga ERE.

5. Brenda dy (2) muajsh pas marrjes së opinionit të sekretariatit, ERE duhet të miratojë vendimin përfundimtar në lidhje me certifikimin e operatorit të sistemit të transmetimit, duke marrë në konsideratë këtë opinion. Vendimi i ERE-s dhe opinionin e Sekretariatit të Komunitetit të Energjisë duhet të publikohen së bashku.

6. Kur vendimi përfundimtar i ERE-s ndryshon nga opinionin e Sekretariatit, ERE duhet të sigurojë dhe të publikojë së bashku me vendimin arsyet se pse ndryshon vendimi dhe duhet të informojë edhe Sekretariatit.



7. Vendimi përfundimtar i ERE-s për certifikimin e operatorit të sistemit të transmetimit dhe për materialet e tjera, si u përmendën në këtë nen, duhet të publikohen në Fletoren Zyrtare, në faqen e internetit të ERE-s .

8. Me kërkesë të veçantë të operatorit të sistemit të transmetimit të certifikuar ose me iniciativën e ERE-s, procedura e certifikimit duhet të ndiqet nga nxjerrja e një licence të re për operatorin e sistemit të transmetimit ose modifikimi i licencës ekzistuese, si mund të kërkohet, bazuar në procedurat e licencimit të përcaktuara në Rregullat e Licencimit të miratuara nga ERE.

Neni 12

Certifikimi në lidhje me vendet e treta

Procedura e certifikimit në lidhje me vendet e treta, sipas rastit kur operatori i sistemit të transmetimit ose, pronari i rrjetit të transmetimit, kontrollohet nga një person/persona nga një vend i tretë/ ose vende të treta, duhet të zbatohet sipas nenit 8 të Rregullores duke marrë në konsideratë kërkesat e veçanta të përcaktuara në këtë Rregullore.

Neni 13

Rihapja e procedurës së certifikimit

1. ERE, në bazë të kompetencave të saj për monitorimin e pajtueshmërisë së vazhdueshme të operatorit të caktuar të sistemit të transmetimit me kërkesat për pavarësinë dhe ndarjen e saj, duhet të rihapë një procedurë certifikimi për të siguruar pajtueshmërinë në raste të veçanta:

a) Me njoftimin e OST-së. OST njofton ERE për çdo transaksion të planifikuar që mund të kërkojë një rivlerësim të përputhshmërisë së tij me kërkesat për pavarësi dhe ndarjen e OST-së.

b) Me iniciativën e saj, kur ka dijeni për një ndryshim të caktuar mbi të drejtat ose ndikimin tek OST i cili mund të çojë në shkelje të kërkesave për pavarësinë dhe ndarjen e OST-së, ose kur ka arsye për të besuar që kjo shkelje mund të ketë ndodhur; ose

c) Sipas një kërkesë të arsyetuar nga Sekretariati.

2. Për qëllim të këtij neni, duhet të rihapet një procedurë certifikimi nga ERE sipas neneve 10 dhe 11 të Rregullores.

3. Rihapja e procedurës së certifikimit duhet të ndiqet nga vendimi i ri për certifikimin e operatorit

të sistemit të transmetimit, i cili mund të pasohet me nxjerrjen e një licence të re për operatorin e sistemit të transmetimit, sipas paragrafit 8, neni 11 të Rregullores.

4. Shkelja e dispozitave të këtyre rregullave dhe mosparaqitja e informacionit sipas përcaktimeve të kësaj Rregullore e bën certifikimin ekzistues të pavlefshëm.

KAPITULLI V

DISPOZITAT PËRFUNDIMTARE

Neni 14

Mbrojtja e informacionit privat

1. Në rastet kur dokumentet, të dhënat dhe/ose informacioni, i paraqitur nga kompania aplikuese tek ERE ose Sekretariati, duhet të trajtohet si informacion privat ose informacion i ndjeshëm tregtar, kompania që po aplikon duhet të tregojë qartë se cila pjesë e dokumenteve, të dhënave dhe/ose informacionit duhet të shikohet si private ose si informacion i ndjeshëm tregtar.

2. ERE ose Sekretariati nuk e kanë detyrim që t'i trajtojnë ato dokumente, të dhëna dhe informacione të paraqitura nga kompania që po aplikon si informacione private ose informacione të ndjeshme tregtare, nëse kompania që po aplikon nuk bën shënimet e duhura që kërkojnë nga paragrafi 1 i këtij neni.

3. ERE ose Sekretariati duhet të kenë të drejtat e tyre për ta trajtuar çdo dokument, të dhënë dhe informacion si privat ose të ndjeshëm tregtar sipas gjykimit të saj.

4. ERE ose Sekretariati duhet ta mbrojë informacionin privat ose informacionin e ndjeshëm tregtar sipas kushteve dhe termave të parashikuara tek ligjet në fuqi. Një informacion i tillë mund të publikohet vetëm në rastet kur kërkohet nga ligjet që zbatohen.

Neni 15

Detyrimet

Shkelja e kërkesave të Rregullores ose çdo shkelje tjetër e ngjashme mund të shkaktojë detyrime për palën fajtoare sipas termave dhe kushteve të parashikuara nga legjislativi në fuqi.



Neni 16
Ankimimi

Vendimi i ERE-s sipas kësaj Rregulloreje dhe/apo kontestimet në lidhje më të mund të trajtohen me negociim mes aplikuesit dhe ERE dhe/ose të ankimohet nga aplikuesi sipas procedurave të përshkruara në “Rregullat për organizimin, funksionimin dhe procedurave të ERE-s” apo në gjykatën e cila ka kompetencën dhe juridiksionin për këto çështje (Gjykata Tiranës/Gjykata Administrative).

Neni 17
Amendamente të Rregullores

Këto rregulla janë objekt rishikimi dhe ndryshimi me vendim të Bordit të ERE-s, në përputhje me “Rregullat për organizimin, funksionimin dhe procedurave të ERE-s”.

Neni 18
Hyrja në fuqi

Këto Rregulla hyjnë në fuqi në datën e miratimit nga ERE.

SHTOJCA
PYETËSORI PËR CERTIFIKIMIN E OPERATORIT TË SISTEMIT TË
TRANSMETIMIT të GAZIT NATYROR

I. Informacion i përgjithshëm:

(1) Ju lutem jepni të dhënat e mëposhtme të kontaktit:

- a) Emrin dhe adresën e kompanisë që do të certifikohet si operator i sistemit të transmetimit:

- b) Adresën në internet të operatorit të sistemit të transmetimit:

- c) Emri, adresa, numri i telefonit, faksit dhe adresa e e-mailit dhe pozicioni që ka në kompani, personi i kontaktit tek operatorit të sistemit të transmetimit:

**II. Ju lutem plotësoni formën e ndarjes të pronësisë (*Ownership Unbundling*)****(1) Pronësia e sistemit të transmetimit nga operatori i sistemit të transmetimit – (neni 9(1)(a) dhe 9(5) i Direktivës 2009/73/EC¹)**

a) Në lidhje me pronësinë e sistemit të transmetimit, ju lutem paraqisni analizat:

- (i) Që specifikojnë të gjitha sistemet e transmetimit në pronësi të operatorit të sistemit të transmetimit në Shqipëri (po ashtu edhe ato që janë në ndërtim ose që nuk janë ndërtuar para datës 6 tetor 2011), duke përfshirë ndërlidhësit dhe rrjetet e veçanta të transmetimit;
- (ii) Që specifikojnë sistemet e transmetimit, të cilat janë në zotërim (të plotë ose të pjesshëm) nga operatori i sistemit të transmetimit në vendet e tjera të Komunitetit të Energjisë;
- (iii) Që tregojnë të gjithë pronarët e sistemeve të transmetimit në fjalë duke specifikuar aksionet e secilit pronar, në rastin kur operatori i sistemit të transmetimit e zotëron këtë sistem pjesërisht.

(i):

(ii):

(iii):

b) Informoni nëse operatori i sistemit të transmetimit jep me koncesion ose me qira sistemet e transmetimit për ndonjë nga palët:

c) Në rast se operatori i sistemit të transmetimit është një sipërmarrje e përbashkët, e cila i përket dy ose tre kompanive të cilat zotërojnë sisteme transmetimi në vende të ndryshme të Komunitetit të Energjisë, informoni nëse të gjitha palët e sipërmarrjes së përbashkët janë operatorë të sistemit të transmetimit të miratuar sipas modelit të Operatorit të Pavarur të Sistemit (ISO) ose modelit të Operatorit të Pavarur të Transmetimit (ITO); ju lutem shkruajini këto kompani dhe tregoni statusin e OST-së:

(2) Kontrolli dhe zotërimi i operatorit të sistemit të transmetimit të gazit natyror – (Neni 9(1)(b)-(d), 9(2), 9(3) dhe 9(7) i direktivës 2009/73/EC)

a) Kërkohet që operatori i sistemit të transmetimit të mos kontrollohet nga ndonjë person i përfshirë në prodhimin ose furnizimin me gaz natyror dhe/ose energji elektrike. Për të provuar zotërimin dhe kontrollin mbi operatorin e sistemit të transmetimit kërkohet një listë e

¹ Direktiva 2009/73/EC e Parlamentit Europian dhe e Këshillit, datë 13 korrik 2009 në lidhje me rregullat e përbashkëta për tregun e brendshëm të gazit natyror dhe shfuqizim i direktivës 2003/55/EC



kompanive të cilat i përkasin të njëjtit grup². Për këtë arsye kërkohet informacioni i mëposhtëm:

- (i) Lista e të gjitha shoqërive/personave që kontrollojnë operatorin e sistemit të transmetimit në mënyrë direkte ose indirekte;
- (ii) Listën e shoqërive që janë aktive në Shqipëri të cilat kontrollohen në mënyrë direkte ose indirekte:
 - nga këto palë,
 - nga operatori i sistemit të transmetimit të gazit natyror.
- (iii) listën e shoqërive që kryejnë funksionet e prodhimit ose furnizimit në rast kur i njëjti person në mënyrë të drejtpërdrejtë ose jo ushtron kontroll ose ndonjë të drejtë mbi operatorin e sistemit të transmetimit dhe këto shoqëri.

Për çdo deklaram të përmendur në pikat më sipër nga (i)-(iii) natyra dhe mënyra e kontrollit duhet të specifikohen (*p.sh.* të drejtat e votimit, të drejtat e vetos, mbajtja e shumicës së aksioneve, kompetencave për të emëruar anëtarët e bordit mbikëqyrës, bordit drejtues, ose organeve ligjore që përfaqësojnë shoqërinë, kontrollin *de facto* dhe *de jure*, kontrollin e vetëm ose kontrollin e përbashkët)³.

Informacioni që kërkohet në këtë pjesë mund të ilustruhet duke përdorur organogramën ose diagrame të ndryshme për të treguar strukturën e pronësisë dhe kontrollin e kompanive. Ju lutem përfshini dispozitat e duhura ligjore dhe tregoni se cila pjesë e informacionit është private.

- (i):
- (ii):
- (iii):

b) Në rast se një organ publik ushtron të drejtat e përshkruara në (nenet 9(1)(b)-(d) të direktivës 2009/73/EC), dispozitat e ndarjes se aktiviteteve kërkojnë të sigurojnë pavarësinë midis organeve publike që i ushtrojnë këto të drejta mbi aktivitetet e transmetimit, prodhimit dhe furnizimit. Prandaj në rast se një ose organe të ndryshme qendrore ose vendore (*siç janë ministratë*) i ushtrojnë këto të drejta, është e nevojshme të futen mekanizma që e sigurojnë këtë pavarësi. Në lidhje me këtë ju lutem përgjigjuni pyetjeve më poshtë:

- (i) Ju lutem përshkruani shkurt nëse organet publike ushtrojnë kontroll të drejtpërdrejtë ose jo mbi ndonjë të drejtë tek aktivitetet e transmetimit, prodhimit dhe furnizimit
- (ii) Në rast se organet qeveritare qendrore ose vendore i ushtrojnë këto të drejta për kompanitë e përfshira në transmetim, gjenerim, prodhim, dhe furnizim ju lutem:
 - përshkruani në detaje se cili organ qeveritar i ushtron këto të drejta dhe mbi cilat kompani
 - përshkruani shkurt ndërvarësitë kushtetuese (ligjore, financiare) midis këtyre organeve qeveritare
 - Përshkruani shkurt se si mundësohet që të drejtat e përshkruara në (nenet 9(1)(b)-(d) të Direktivës 2009/73/EC), përkatësisht në lidhje me sistemet e transmetimit ushtrohen në mënyrë të pavarur nga aktivitetet e gjenerimit, prodhimit ose furnizimit

² Shikoni konceptin e kontrollit të Rregullorja 804/2004 e Komisionit e cila zbaton Rregulloren e Këshillit 9EC) nr. 138/2004 për kontrollin e grupimeve midis kompanive (OJ L 133/1 of 30.4.2004)

³ Për më shumë informacion ju lutem shikoni Njoftimin Ligjor të Konsoliduar të Komisionit sipas Rregullores së Këshillit nr. 139/2004 mbi kontrollin e grupimeve midis kompanive (OJ C 95/1 datë 16.4.2008)



(i):

(ii):

(3) **Detyrat e operatorit të sistemit të transmetimit të gazit natyror– (neni 13 i Direktivës 2009/73/EC)**

a) *Operatori i sistemit të transmetimit duhet të funksionojë në rrjet sipas (neni 13 i direktivës 2009/73/EC). Ju lutem:*

- (i) Përshkruani shkurt të gjitha detyrat që duhet të përmbushë dhe përfundojë operatori i sistemit të transmetimit në përputhje me (nenin 13 i direktivës 2009/73/EC). Dorëzoni të gjitha pjesët e dispozitave përkatëse rregullatore (ligjet, kodet e rrjeteve, marrëveshjet midis kompanive dhe rregulloret) duke treguar që operatori i sistemit të transmetimit ka përgjegjësi të plotë për të përmbushur detyrat e përmendura më sipër dhe të tregojë qartë pjesët përkatëse që mbështesin analizën.
- (ii) Tregoni që në bazë të Rregullores që po zbatohet ERE ka kompetencat, duke përfshirë këtu mundësinë për të vendosur gjoha parandaluese, të cilat ERE duhet t'i zbatojë kur operatori i sistemit të transmetimit nuk po i përmbush plotësisht ose pjesërisht detyrat dhe përgjegjësitë e specifikuar në (nenin 13 i direktivës 2009/73/EC)

(i):

(ii):

VENDIM

Nr. 101, datë 5.8.2015

**PËR FILLIMIN E PROCEDURAVE
PËR SHQYRTIMIN E APLIKIMIT TË
SHOQËRISË TAP AG PËR CERTIFIKIM
SI OPERATOR I PAVARUR I
TRANSMETIMIT TË GAZIT NATYROR**

Bazuar në nenin 9, të ligjit nr. 9946, datë 30.06.2008 “Për sektorin e gazit natyror”, të ndryshuar, “Rregullat për certifikimin e operatorit të sistemit të transmetimit për gazin natyror”, të miratuar me vendimin nr. 100, datë 5.8.2015 të Bordit të ERE-s, Opinionit të Përbashkët Përfundimtar/*Final Joint Opinion*, miratuar me vendimin nr. 64, datë 13.6.2013 të Bordit të Komisionerëve të ERE-s, nenet 7 dhe 149 të ligjit nr. 8485, datë 12.05.1999, Kodi i Procedurave Administrative të Republikës së Shqipërisë, i ndryshuar, Traktatit të Komunitetit të Energjisë të ratifikuar me ligjin nr. 9501, datë 3.4.2006, “Rregullat për organizimin, funksionimin dhe procedurave të ERE-s”,

vendimit të Këshillit Ministerial nr. D/2011/02/MC-EnC, si dhe në përputhje me direktivën 2009/73-EC dhe rregulloren EC nr. 715/2009, Bordi i ERE-s, në mbledhjen e tij të datës 5.8.2015, mbasi shqyrtoi aplikimin e TAP AG për certifikim si operator i pavarur i transmetimit të gazit natyror, si dhe relacionin e përgatitur nga grupi i punës për shqyrtimin e këtij aplikimi,

dhe konstatoi se:

- Në datë 1 korrik 2015, TAP AG ka paraqitur në ERE kërkesën nr. 12/11 prot, datë 6.7.2015, dhe dokumentacionin përkatës i cili është gjithashtu i aksesueshëm edhe në *data room*-in e krijuar për qëllim të certifikimit si operator i pavarur i transmetimit të gazit natyror në përputhje me piken 4.5.2 të Opinionit të Përbashkët Përfundimtar/*Final Joint Opinion*, miratuar me vendimin nr. 64, datë 13.06.2013 të Bordit të Komisionerëve të ERE-s.

- Kjo kërkesë dhe dokumentacioni i paraqitur në ERE, është vënë gjithashtu në dispozicion të autoriteteve RAE dhe AEEGSI



si pjesë e gjithë dokumentacionit të nevojshme për procedurën e certifikimit nga tre rregullatorët e vendeve ku kalon projekti TAP përkatësisht Greqi, Shqipëri dhe Itali.

- Paragrafi 4.5 i Opinionit të Përbashkët Përfundimtar (*Final Joint Opinion*) vendos përjashtimin e TAP AG nga rregullat mbi ndarjen e pronësisë sipas nenit 9, pika 1 e direktivës 2009/73/EC për një periudhë 25 vjet duke filluar nga vendosja në përdorim e infrastrukturës;

- Paragrafi 4.5, pika 2 e Opinionit të Përbashkët Përfundimtar (*Final Joint Opinion*) kërkon që TAP AG të certifikohet si operator i pavarur i transmetimit për gazin natyror para fillimit të ndërtimit të infrastrukturës dhe jo me vonë se data 1 janar 2018.

- ERE në cilësinë e autoritetit përgjegjës për rregullimin e sektorit të gazit natyror dhe në përputhje me detyrimet sipas Traktatit të Komunitetit të Energjisë ratifikuar me ligjin nr. 9501 datë 3.4.2006, ka miratuar me vendimin nr. 100, datë 5.8.2015 “Rregullat për certifikimin e operatorit të sistemit të transmetimit për gazin natyror”;

Për gjithë sa më sipër, Bordi i ERE-s

VENDOSI:

1. Fillimin e procedurave për shqyrtimin e aplikimit të shoqërisë TAP AG për certifikim si operator i pavarur i transmetimit të gazit natyror.

2. Të sigurojë, brenda këtyre procedurave një ndërveprim me RAE dhe AEEGSI, me qëllim miratimin e një vendimi të përbashkët për certifikimin e TAP AG sipas modelit ITO në përputhje me dispozitat e kapitullit IV të direktivës 2009/73/EC, me përjashtim të nenit 22 të kësaj direktive, siç parashihet me nenin 4.5, paragrafi 2 i Opinionit të Përbashkët Përfundimtar.

3. Ky vendim i njoftohet Sekretariatit të Komunitetit të Energjisë, Ministrisë së Energjisë dhe Industrisë, Ministrisë së Zhvillimit Ekonomik Tregtisë dhe Sipërmarrjes, Autoritetit të Konkurrencës dhe TAP AG.

Ky vendim hyn në fuqi menjëherë

Ky vendim botohet në Fletoren Zyrtare

KRYETARI
Petrit Ahmeti

VENDIM

Nr. 102, datë 18.8.2015

PËR FILLIMIN E PROCEDURAVE PËR SHQYRTIMIN DHE MIRATIMIN E RREGULLAVE TË ANKANDIT TË ZYRËS SË KOORDINUAR TË ANKANDEVE PËR EVROPËN JUGLINDORE (SEE CAO) VERSIONI 1.2

Në mbështetje të neneve 16 dhe 65 pika 1 të ligjit nr. 43/2015 “Për sektorin e energjisë elektrike”, nenit 26 të Rregullave të Praktikës dhe Procedurave të ERE-s, miratuar me vendimin e Bordit të Komisionerëve të ERE-s nr. 21, datë 18.03.2009, i ndryshuar, Bordi i ERE-s, në mbledhjen e tij të datës 18.08.2015, mbasi shqyrtoi draftin e përgatitur dhe të rënë dakord nga (SEE CAO) dhe TSO-të aksionarë të saj, të Rregullave të Ankandit të Zyrës së Koordinuar të Ankandeve për Evropën Juglindore (SEE CAO) dhe relacionin përkatës, për fillimin e procedurave për shqyrtimin dhe miratimin e Rregullave të Ankandit të Zyrës së Koordinuar të Ankandeve për Evropën Juglindore (SEE CAO),

VENDOSI:

1. Të fillojë procedurat për shqyrtimin dhe miratimin e rregullave të ankandit të zyrës së koordinuar të ankandeve për Evropën Juglindore SEE CAO (bashkëlidhur draft “Rregullat e ankandit versionin 1.2” në gjuhën origjinale angleze dhe të përkthyer në gjuhën shqipe.

2. Në çdo rast mosmarrëveshjes, palët do t’i referohen versionit origjinal të “Rregullave të ankandit versionin 1.2” në gjuhën angleze, për interpretim.

3. Drejtoria Juridike dhe e Mbrojtjes së Konsumatorit të njoftojë personat e interesuar për vendimin e Bordit të ERE-s.

Ky vendim hyn në fuqi menjëherë.

Ky vendim botohet në Fletoren Zyrtare.

KRYETARI
Petrit Ahmeti

**VENDIM****Nr. 103, datë 18.8.2015**

**PËR LICENCIMIN E SHOQËRISË
“LENGARICA & ENERGY” SHPK NË
AKTIVITETIN E PRODHIMIT TË
ENERGJISË ELEKTRIKE NGA HEC
“LENGARICA” (ME FUQI TË
INSTALUAR 8.94 MW)**

Në mbështetje të nenit 16 dhe nenit 37 pika 2, germa “a” të ligjit nr. 43/2015 “Për sektorin e energjisë elektrike”; neneve 4, pika 1, germa “a”, 5 pika 1, germa “a”, 13 dhe 14 pika 1 të “Rregullores për procedurat e licencimit, modifikimit, transferimit të plotë/pjesshëm dhe rinovimit të licencave”, të miratuar me vendimin e Bordit të Komisionerëve nr. 108, datë 9.9.2008, Bordi i Entit Rregullator të Energjisë (ERE), në mbledhjen e tij të datës 18.8.2015, mbasi shqyrtoi aplikimin e paraqitur nga shoqëria “Lengarica & Energy” sh.p.k, si dhe relacionin e Drejtorisë së Licencimit, Monitorimit të Tregut dhe të të Licencuarve dhe Drejtorisë Juridike dhe Mbrojtjes së Konsumatorit për licencimin në aktivitetin e prodhimit të energjisë elektrike,

konstatoi se:

Aplikimi i shoqërisë “Lengarica & Energy” sh.p.k, plotëson tërësisht kërkesat e parashikuara nga ERE në “Rregulloren për procedurat e licencimit, modifikimit, transferimit të plotë/të pjesshëm dhe rinovimit të licencave” si më poshtë:

- Formati i aplikimit (neni 9, pika 1) është plotësuar në mënyrë korrekte.

- Dokumentacioni juridik, administrativ dhe pronësor (neni 9, pika 2) është plotësuar në mënyrë korrekte.

- Dokumentacioni financiar dhe fiskal (neni 9, pika 3) është plotësuar në mënyrë korrekte.

- Dokumentacionit teknik (neni 9, pikat 4.1.1, 4.1.2, 4.1.3, 4.1.4, 4.1.5) është plotësuar në mënyrë korrekte.

Për gjithë sa më sipër, Bordi i ERE-s

VENDOSI:

1. Të licencojë shoqërinë “Lengarica & Energy” sh.p.k, në aktivitetin e prodhimit të energjisë elektrike nga HEC “Lengarica” me fuqi të instaluar 8.94 MW, për një afat 30-vjeçar.

2. Drejtoria e Licencimit, Monitorimit të Tregut dhe të të Licencuarve të njoftojë aplikuesin për vendimin e Bordit të ERE-s.

Ky vendim hyn në fuqi menjëherë.

Ky vendim botohet në Fletoren Zyrtare.

**KRYETARI
Petrit Ahmeti**

VENDIM**Nr. 104, datë 18.8.2015**

**PËR LICENCIMIN E SHOQËRISË
“LENGARICA & ENERGY” SH.P.K, NË
AKTIVITETIN E TREGËTIMIT TË
ENERGJISË ELEKTRIKE**

Në mbështetje të neneve 16 , 37 pika 2, germa “d”, dhe 110 të ligjit 43/2015 “Për sektorin e energjisë eklektike”, nenit 4 pika 1 germa “g”, neni 5 pika 2 dhe neneve 13 dhe 14 të “Rregullores për procedurat e licencimit, modifikimit, transferimit të plotë/pjesshëm dhe rinovimit të licencave”, të miratuar me vendimin e Bordit të Komisionerëve nr. 108, datë 9.9.2008, Bordi i Entit Rregullator të Energjisë (ERE), në mbledhjen e tij të datës 18.8.2015, mbasi shqyrtoi aplikimin e paraqitur nga shoqëria “Lengarica & Energy” sh.p.k, si dhe relacionin e Drejtorisë së Licencimit, Monitorimit të Tregut dhe të të Licencuarve dhe Drejtorisë Juridike dhe Mbrojtjes së Konsumatorit për licencimin në aktivitetin e tregtimit të energjisë elektrike të kësaj shoqërie, konstatoi se:

Aplikimi i shoqërisë “Lengarica & Energy” sh.p.k, plotëson tërësisht kërkesat e parashikuara nga ERE në “rregulloren për procedurat e licencimit, modifikimit, transferimit të plotë/të pjesshëm dhe rinovimit të licencave” si më poshtë:

- Formati i aplikimit (neni 9, pika 1), është plotësuar në mënyrë korrekte.

- Dokumentacioni juridik, administrativ dhe pronësor (neni 9, pika 2 gjerat “a”, “b”, “c”, “d”, “e”) është plotësuar në mënyrë korrekte.

- Dokumentacioni financiar dhe fiskal (neni 9, pika 3) është plotësuar në mënyrë korrekte.

- Të dhënat specifike sipas tipit të licencës (neni 9, pika 4./10 gjerat “a”, “b” dhe “c”) janë plotësuar në mënyrë korrekte.



Për gjithë sa më sipër, Bordi i ERE-s

VENDOSI:

1. Të licencojë shoqërinë “Lengarica & Energy” sh.p.k, në aktivitetin e tregtimit të energjisë elektrike, për një afat 30-vjeçar.

2. Drejtorja e Licencimit, Monitorimit të Tregut dhe të të Licencuarve të njoftojë aplikuesin për vendimin e Bordit të ERE-s.

Ky vendim hyn në fuqi menjëherë.

Ky vendim botohet në Fletoren Zyrtare.

KRYETARI
Petrit Ahmeti

VENDIM

Nr. 105, datë 18.8.2015

**PËR LICENCIMIN E SHOQËRISË
“LENGARICA & ENERGY” SHPK, NË
AKTIVITETIN E FURNIZIMIT TË
ENERGJISË ELEKTRIKE**

Në mbështetje të neneve 16; 37 pika 2, germa “ç”, dhe 110 të ligjit 43/2015 “Për sektorin e energjisë eklektike”, neneve 4 pika 1 germa “f”; 5 pika 1 germa “f”; 13 dhe 14 të “Rregullores për procedurat e licencimit, modifikimit, transferimit të plotë/të pjesshëm dhe rinovimit të licencave”, të miratuar me vendimin e Bordit të Komisionerëve nr. 108, datë 9.9.2008, Bordi i Entit Rregullator të Energjisë (ERE), në mbledhjen e tij të datës 18.8.2015, mbasi shqyrtoi aplikimin e paraqitur nga shoqëria “Lengarica & Energy” sh.p.k., si dhe relacionin e Drejtorisë së Licencimit, Monitorimit të Tregut dhe të të Licencuarve dhe Drejtorisë Juridike dhe Mbrojtjes së Konsumatorit për licencimin në aktivitetin e furnizuesit të energjisë elektrike të kësaj shoqërie, konstatoi se:

Aplikimi i shoqërisë “Lengarica & Energy” sh.p.k., plotëson tërësisht kërkesat e parashikuara nga ERE në “Rregulloren për procedurat e licencimit, modifikimit, transferimit të plotë/të pjesshëm dhe rinovimit të licencave”, si më poshtë:

- Format i aplikimit (neni 9, pika 1) është plotësuar në mënyrë korrekte.

- Dokumentacioni juridik, administrativ dhe pronësor (neni 9, pika 2) është plotësuar në mënyrë korrekte.

Faqe | 11092

- Dokumentacioni financiar dhe fiskal (neni 9, pika 3) është plotësuar në mënyrë korrekte.

- Të dhënat specifike sipas tipit të licencës (neni 9 pika 4/9 germa “a”, “b” dhe “c”) janë plotësuar tërësisht.

Për gjithë sa më sipër, Bordi i ERE-s

VENDOSI:

1. Licencimin e shoqërisë “Lengarica & Energy” sh.p.k., në aktivitetin e furnizimit të energjisë elektrike për një afat 5-vjeçar.

2. Drejtorja e Licencimit, Monitorimit të Tregut dhe të të Licencuarve të njoftojë aplikuesin për vendimin e Bordit të ERE-s.

Ky vendim hyn në fuqi menjëherë.

Ky vendim botohet në Fletoren Zyrtare.

KRYETARI
Petrit Ahmeti

VENDIM

Nr. 106, datë 18.8.2015

**PËR FILLIMIN E PROCEDURAVE PËR
RINOVIMIN E LICENCËS SË
SHOQËRISË “ENERGY SUPPLY” SHPK
NË AKTIVITETIN E TREGTIMIT TË
ENERGJISË ELEKTRIKE, MIRATUAR
ME VENDIMIN E BORDIT TË
KOMISIONERËVE TË ERE-S NR. 6,
DATË 2.2.2011**

Në mbështetje të neneve 16; 20 germa “b”, dhe 110 të ligjit nr. 43/2015 “Për sektorin e energjisë elektrike”, neneve 4 pika 1 germa “g”; 10 pikat 1 dhe 3 dhe nenit 16 të “Rregullores për procedurat e licencimit, modifikimit, transferimit të plotë/të pjesshëm dhe rinovimit të licencave”, të miratuar me vendimin e Bordit të Komisionerëve nr. 108, datë 9.9.2008, nenit 18, pika 1 germa “a”, të “Rregullave të praktikës dhe procedurave të ERE-s”, miratuar me vendimin e Bordit të Komisionerëve, nr. 21, datë 18.3.2009, Bordi i ERE-s, në mbledhjen e tij të datës 18.08.2015, mbasi shqyrtoi kërkesën e shoqërisë “Energy Supply” sh.p.k. për rinovimin e licencës në aktivitetin e tregtimit të energjisë elektrike dhe relacionin e përgatitur nga drejtoritë teknike,



konstatoi se:

Aplikimi i shoqërisë “Energy Supply” sh.p.k., plotëson pjesërisht kërkesat e parashikuara nga ERE në “Rregulloren për procedurat e licencimit, modifikimit, transferimit të plotë/të pjesshëm dhe rinovimit të licencave”, si më poshtë:

- Format i aplikimit (neni 9, pika 1) është plotësuar në mënyrë korrekte.

- Dokumentacioni juridik, administrativ dhe pronësor (neni 9, pika 2) është plotësuar në mënyrë korrekte.

- Dokumentacioni financiar dhe fiskal (neni 9, pika 3) është plotësuar në mënyrë korrekte.

- Të dhënat specifike sipas tipit të licencës (neni 9, pika 4/10 germa “c”) janë plotësuar në mënyrë korrekte.

Për mungesën e dokumentacionit që ka të bëjë me: Sasinë e energjisë elektrike të parashikuar për t’u tregtuar në GWh dhe kapitalin financiar të shoqërisë (neni 9, pika 4/10, gjerat “a” dhe “b”), do të njoftohet subjekti që në bazë të “Rregullores për procedurat e licencimit, modifikimit, transferimit të plotë/ të pjesshëm dhe rinovimit të licencave”, neni 10, pika 10 dhe neni 11, pika 1, t’i paraqesë këto në ERE, brenda afateve.

Për gjithë sa më sipër cituar, Bordi i ERE-s

VENDOSI:

1. Të fillojë procedurat për shqyrtimin e kërkesës së shoqërisë “Energy Supply” sh.p.k. për rinovimin e licencës në aktivitetin e tregtimit të energjisë elektrike, miratuar me vendimin e Bordit të Komisionerëve të ERE-s nr .6, datë 2.2.2011.

2. Drejtoria e Licencimit, Monitorimit të Tregut dhe të të Licencuarve të njoftojë aplikuesin për vendimin e Bordit të ERE-s.

Ky vendim hyn në fuqi menjëherë.

Ky vendim botohet në Fletoren Zyrtare.

KRYETARI
Petrit Ahmeti

VENDIM

Nr. 107, datë 18.8.2015

PËR FILLIMIN E PROCEDURAVE PËR LICENCIMIN E SHOQËRISË “ENERGY SUPPLY” SHPK NË AKTIVITETIN E FURNIZIMIT TË ENERGJISË ELEKTRIKE

Në mbështetje të neneve 16; 20 germa “b”; 37 pika 2, germa “ç”, dhe 110 të ligjit nr. 43/2015 “Për sektorin e energjisë elektrike”, neneve 4 pika 1 germa “P”; 5 pika 1 germa “P” 8; 10, pika 1 dhe 3, të “Rregullores për procedurat e licencimit, modifikimit, transferimit të plotë/të pjesshëm dhe rinovimit të licencave”, të miratuar me vendimin e Bordit të Komisionerëve nr. 108, datë 9.9.2008, nenit 18, pika 1 germa “a”, të “Rregullave të Praktikës dhe Procedurave të ERE-s”, miratuar me vendimin e Bordit të Komisionerëve, Nr. 21, datë 18.3.2009, Bordi i ERE, në mbledhjen e tij të datës 18.8.2015, mbasi shqyrtoi kërkesën e shoqërisë “Energy Supply” sh.p.k. për licencimin në aktivitetin e furnizimit të energjisë elektrike dhe relacionin e përgatitur nga drejtoritë teknike,

konstatoi se:

Aplikimi i shoqërisë “Energy Supply” sh.p.k. plotëson pjesërisht kërkesat e parashikuara nga ERE në “Rregulloren për procedurat e licencimit, modifikimit, transferimit të plotë/të pjesshëm dhe rinovimit të licencave”, si më poshtë:

- Format i aplikimit (neni 9, pika 1) është plotësuar në mënyrë korrekte.

- Dokumentacioni juridik, administrativ dhe pronësor (neni 9, pika 2) është plotësuar në mënyrë korrekte.

- Dokumentacioni financiar dhe fiskal (neni 9, pika 3) është plotësuar në mënyrë korrekte.

- Të dhënat specifike sipas tipit të licencës (neni 9 pika 4/9 germa “b” është plotësuar në mënyrë korrekte.

Për mungesën e dokumentacionit që ka të bëjë me: Sasinë e energjisë mesatare të parashikuar për furnizimin e konsumatorëve dhe kapitalin financiar të shoqërisë, (neni 9, pika 4/9, gjerat “a” dhe “c”), do të njoftohet subjekti që në bazë të “Rregullores për procedurat e licencimit, modifikimit, transferimit të plotë / të pjesshëm dhe rinovimit të licencave”, neni 10, pika 10 dhe neni 11, pika 1, t’i paraqesë këto në ERE, brenda afateve.



Për gjithë sa më sipër cituar, Bordi i ERE-s

VENDOSI:

1. Të fillojë procedurat për shqyrtimin e kërkesës së shoqërisë “Energy Supply” sh.p.k. për licencimin në aktivitetin e furnizimit të energjisë elektrike.

2. Drejtoria e Licencimit dhe Monitorimit të Tregut dhe të të Licencuarve të njoftojë aplikuesin për vendimin e Bordit të ERE-s.

Ky vendim hyn në fuqi menjëherë.

Ky vendim botohet në Fletoren Zyrtare.

KRYETARI
Petrit Ahmeti

	Formati 61x86/8
--	-----------------

Shtypshkronja e Qendrës së Botimeve Zyrtare
Tiranë, 2015

Adresa
Bulevardi “Gjergj Fishta”,
pas ish-Ekspozitës “Shqipëria Sot”,
Tel:042427005, 04 2427006

Çmimi 140 lekë